

242A

In Festo Maternitatis B. M. V.

Duplex majus.

AD VESPERAS.

*Añā. Beata es Virgo Maria... cum
rel. de Laud.**Psalmi consueti de Sta. Maria, ut
in ejus Officio parvo.*CAPITULUM. *Eccli. 24.*

Qui creavit me, requievit in tabernaculo meo, et dixit mihi: In Jacob inhabita, et in electis meis mitte radices.

HYMNUS.

Ave maris stella,
Dei mater alma,
Atque semper virgo,
Felix cœli porta.

Sumens illud Ave
Gabrielis ore,
Funda nos in pace,
Mutans Hevæ nomen.

Solve vincla reis,
Profer lumen cæcis,
Mala nostra pelle,
Bona cuncta posce.

Monstra te esse matrem,
Sumat per te preces,
Qui pro nobis natus
Tulit esse tuus.

Virgo singularis,
Inter omnes mitis,
Nos culpis solutos
Mites fac & castos.

Vitam præsta puram,

Iter para tutum,
Ut videntes Jesum
Semper collætémur.
Sit laus Deo Patri,
Summo Christo decus,
Spiritus Sancto,
Tribus honor unus. Amen.

ŷ. Benedicta tu in mulieribus. R.
Et benedictus fructus ventris tui.

Ad Magnificat. Añā. Cum jucunditate Maternitatem beatæ Mariæ semper virginis celebremus.

ORATIO.

Deus, qui de beatæ Mariæ virginis utero Verbum tuum, Angelo nuntiante, carnem suscipere voluisti: præsta supplicibus tuis; ut qui vere eam Genitricem Dei credimus, ejus apud te intercessionibus adjuvemur. Per eundem Dominum...

Et fit com. Dom. curr.

Ad Complet. et Horas fin. Hymn.
Jesu... qui natus...

AD MATUTINUM.

*Invitatorium. Maternitatem beatæ Mariæ virginis celebremus: * Christum ejus Filium adoremus Dominum.*

Psalm. Venite...

HYMNUS.

Cælo Redemptor prætulit
Felicis alvum Virginis,
Ubi caduca membra
Mortale corpus induit.

Hæc Virgo nobis edidit
Nostræ salutis auspicem,
Qui nos redemit sanguine,
Pœnas crucemque pertulit.

Spes læta nostro è pectore
Pellat timores anxios:
Hæc quippe nostras lacrymas,
Precesque defert Filio.

Voces Parentis excipit,
Votisque Natus annuit:
Hanc quisque semper diligat,
Rebusque in arctis invocet.

Sit Trinitati gloria,
Quæ Matris intactum sinum
Ditavit alvo germine,
Laus sit per omne sæculum. Amen.

*Añæ. et Psalm. Nocturnor. ut in
ejus Officio parvo.*

IN I. NOCTURNO.

ŷ. Specie tua et pulchritudine
tua. ʒ. Intende, prospere procede,
et regna.

LECTIO I.

De Libro Ecclesiastici. c. 24.

Ego ex ore Altissimi prodivi primogenita ante omnem creaturam. Ego feci in cœlis, ut oriretur lumen indeficiens, et sicut nebula texi omnem terram. Ego in altissimis habitavi, et thronus meus in columna nubis. Gyrum cœli circuivi sola, et profundum abyssi penetravi: in fluctibus maris ambulavi, et in omni terra steti: et in omni populo et in omni gente primatum habui: et

omnium excellentium, et humilium corda virtute calcavi: et in his omnibus requiem quæsi, et in hæreditate Domini morabor.

ʒ. Felix es, sacra Virgo Maria, et omni laude dignissima: * Ex qua ortus est Sol justitiæ, Christus Deus noster, per quem salvati et redempti sumus. ŷ. Maternitatem beatæ Mariæ Virginis cum gaudio celebremus. * Ex qua...

LECTIO II.

Tunc præcepit, et dixit mihi Creator omnium: et qui creavit me, requievit in tabernaculo meo, et dixit mihi: In Jacob inhabita, et in Israel hæreditare, et in electis meis mitte radices. Ab initio et ante sæcula creata sum, et usque ad futurum sæculum non desinam, et in habitatione sancta coram ipso ministravi. Et sic in Sion firmata sum, et in civitate sanctificata similiter requievi, et in Jerusalem potestas mea. Et radicavi in populo honorificato, et in parte Dei mei hæreditas illius, et in plenitudine Sanctorum detentio mea.

ʒ. Sine tactu pudoris inventa es Mater Salvatoris: * Qui cœlum terramque regit, in tua se clausit viscera factus homo. ŷ. Benedicta tu in mulieribus, et benedictus fructus ventris tui. * Qui cœlum...

LECTIO III.

Quasi cedrus exaltata sum in Libano, et quasi cypressus in monte Sion. Quasi palma exaltata sum in Cades, et quasi plantatio rosæ in Jericho. Quasi oliva speciosa in campis, et quasi platanus exaltata sum juxta aquam in plateis. Sicut cinnamomum et balsamum aromatizans odorem dedi: quasi myrrha electa dedi sua-

vitatem odoris; et quasi storax, et galbanus, et ungula, et gutta, et quasi Libanus non incisus vaporavi habitationem meam, et quasi balsamum non mistum odor meus. Ego quasi terebinthus extendi ramos meos, et rami mei honoris et gratiæ. Ego quasi vitis fructificavi suavitatem odoris.

¶. Multæ filiæ congregaverunt divitias; tu supergressa es universas: * Speciosa facta es, et suavis in deliciis tuis, sancta Dei Genitrix. †. Sentiant omnes tuum juvamen, quicumque celebrant tuam sanctam Maternitatem. * Speciosa... Gloria Patri... * Speciosa...

IN II NOCTURNO.

†. Diffusa est gratia in labiis tuis.
¶. Propterea benedixit te Deus in æternum.

LECTIO IV.

Ex sermone Sti. Leonis Papæ.

Serm. 1 de Nativ. Dom.

Virgo regia davidicæ stirpis eligitur, quæ sacro gravidanda fœtu, divinam humanamque prolem prius conciperet mente, quam corpore: et ne superni ignara consilii ad inusitatos paveret affatus, quod in ea operandum erat à Spiritu Sancto, colloquio discit angelico, nec damnum credit pudoris Dei Genitrix mox futura. Cur enim de conceptionis novitate despéret, cui efficientia de Altissimi virtute promittitur? Confirmatur credentis fides etiam præeuntis attestatione miraculi. Donatur Elisabeth inopinata fœcunditas, ut qui conceptum dederat sterili, daturus non dubitaretur et virgini. Verbum igitur Dei

Filius, qui in principio erat apud Deum, per quem facta sunt omnia, et sine quo factum est nihil, propter liberandum hominem ab æterna morte, factus est homo.

¶. Gloriosa Virginis Mariæ Maternitatem dignissimam recolamus. * Cujus Dominus humilitatem respexit, quæ, Angelo nuntiante, concepit Salvatorem mundi. †. Christo canamus gloriam in hac sacra solemnitate mirabilis Genitricis Dei. * Cujus...

LECTIO V.

Serm. 2 de Nativ. Dom.

Ingreditur hæc infima Jesus Christus Dominus noster de cœlesti sede descendens, et à paterna gloria non recedens, novo ordine, nova nativitate generatus. Novo ordine, quia invisibilis in suis, visibilis factus est in nostris; incomprehensibilis voluit comprehendi; ante tempora manens, esse cœpit in tempore. Nova autem nativitate genitus est; conceptus à Virgine, natus ex Virgine, sine paternæ carnis concupiscentia, sine maternæ integritatis injuria, quia futurum hominum Salvatorem talis ortus decebat, qui et in se haberet humanæ substantiæ naturam, et humanæ carnis inquinamenta nesciret. Origo dissimilis, sed natura consimilis: humano usu et consuetudine, quod credimus, caret: sed divina potestate subnixum est, quod Virgo conceperit, Virgo pepérerit, Virgo permanserit.

¶. Benedicta filia tu à Domino, quia per te fructum vitæ communicavimus: * Sola sine exemplo placuisti Domino nostro Jesu Christo, †. Nostras deprecationes ne des-

picias in necessitatibus nostris, et á periculis cunctis libera nos, sancta Dei Genitrix. * Sola...

LECTIO VI.

Oportuit, ut primam Genitricis integritatem nascentis incorruptio custodiret, et complacitum sibi claustrum pudoris et sanctitatis hospitium, divini Spiritus virtus infusa servaret, quæ statuerat dejecta erigere, confRACTA solidare, et superandis carnis illecebris multiplicatam pudicitiam donare virtutem: ut virginitas, quæ in aliis non poterat salva esse generando, fieret aliis imitabilis renascendo. Hoc ipsum autem, quod Christus nasci eligit ex Virgine, nonne apparet altissimæ fuisse rationis? ut scilicet humano generi natam salutem diabolus ignoraret, et spirituali latente conceptu, quem non alium videret quam alios, non aliter crederet natum esse, quam cæteros. Quod ut fieret, editus est Christus ex Virgine, quam Spiritus Sanctus fecundavit, et cum in omnibus matribus non fiat sine peccati sorde conceptio, hæc inde purgationem traxit, unde concepit.

¶ Benedicta tu inter mulieres, et benedictus fructus ventris tui: * Unde hoc mihi ut veniat Mater Domini mei ad me? ¶ Respexit humilitatem ancillæ suæ, et fecit mihi magna qui potens est. * Unde... Gloria Patri... * Unde.

IN III NOCTURNO.

¶ Fecit mihi magna qui potens est. ¶ Misericordia ejus a progenie in progenies timentibus eum.

LECTIO VII.

Lectio sancti Evangelii secundum Lucam. c. 2.

In illo tempore: Cum redirent, remansit puer Jesus in Jerusalem, et non cognoverunt parentes ejus. Et reliqua.

Homilia Sti. Bernardi Abbatis.

Homilia 1 de laudibus Virginis Matris.

Deum, est Dominum Angelorum Maria suum Filium appellat, dicens: Fili, quid fecisti nobis sic? Quis hoc audeat Angelorum? Sufficit eis, et pro magno habent, quod, cum sint spiritus ex conditione, ex gratia facti sunt, et vocati Angeli, testante David: Qui facit Angelos suos spiritus. Maria vero Matrem se agnoscens, majestatem illam, cui illi cum reverentia serviunt, cum fiducia suum nuncupat filium: nec dignatur nuncupari Deus, quod esse dignatus est. Nam paulo post subdit Evangelista: Et erat subditus illis. Quis? Quibus? Deus hominibus. Deus, inquam, cui Angeli subditi sunt, cui Principatus et Potestates obediunt, subditus erat Mariæ.

¶ Beata es, Virgo Maria, Dei Genitrix, quæ credidisti Domino: perfecta sunt in te, quæ dicta sunt tibi: Propterea benedixit te Deus in æternum. ¶ Diffusa est gratia in labiis tuis: intercede pro nobis ad Dominum Deum nostrum. * Propterea...

Benedictio. Cujus festum colimus, ipsa Virgo Virginum...

LECTIO VIII.

Mirare utrumlibet, et elige quid amplius mireris, sive Filii benignis-

simam dignationem, sive Matris excellentissimam dignitatem. Utrunque stupor, utrinque miraculum. Et quod Deus feminæ obtemperet, humilitas absque exemplo: et quod Deo femina principetur, sublimitas sine socio. In laudibus virginum singulariter canitur, quod sequuntur Agnum quocumque ierit. Quibus ergo laudibus iudicas dignam, quæ etiam præit? Disce, homo, obedire; disce, terra, subdi; disce, pulvis, obtemperare. De Auctore tuo loquens Evangelista: Et erat, inquit, subditus illis. Erubescere, superbe cinis. Deus se humiliat, et tu te exaltas? Deus se hominibus subdit, et tu dominari gestiens hominibus, tuo te præponis Auctori?

¶ Congratulamini mihi omnes, qui diligitis Dominum, quia cum essem parvula, placui Altissimo: * Et de meis visceribus genui Deum et hominem. ¶ Beatam me dicent omnes generationes, quia ancillam humilem respexit Deus. * Et... Gloria. * Et...

Lect. IX de Dom. occ.

Si vero transferri contigerit, IX Lectio erit seq.

Felix Maria, cui nec humilitas defuit, nec virginitas. Et quidem singularis virginitas, quam non temeravit, sed honoravit fecunditas. Et nihilominus specialis humilitas, quam non abstulit, sed extulit fecunda virginitas: et incomparabilis prorsus fecunditas, quam virginitas simul comitatur et humilitas. Quid horum non mirabile? quid non incomparabile? quid non singulare? Mirum vero si non hæsit in horum ponderatione, quid tua iudices dignius admiratione, utrum videlicet potius stupenda sit fecunditas in

Virgine, an in Matre integritas? Sublimitas in prole, an cum tanta sublimitate humilitas? Nisi quod indubitanter horum singulis præferenda sunt simul cuncta: et incomparabiliter excellentius est, atque felicius omnia percepisse, quam aliqua. Et quid mirum, si Deus, qui mirabilis cernitur et legitur in sanctis suis, mirabilem se exhibuit in Matre sua? Veneramini ergo, conjuges, in carne corruptibili carnis integritatem: miramini etiam vos, sacræ virgines, in Virgine fecunditatem: imitamini, omnes homines, Dei Matris humilitatem. Te Deum.

AD LAUDES ET PER HORAS.

Añā. 1. Beata es, virgo Maria, quæ omnium portasti Creatorem.

Psalm. Dominus regnavit... cum reliquis de Dom.

2. Genuisti qui te fecit, et in æternum permanes virgo.

3. Beatam me dicent omnes generationes, quia ancillam humilem respexit Dominus.

4. Fecit mihi magna, qui potens est, et sanctum nomen ejus.

5. Viderunt eam filiae Sion, et beatam dixerunt, et reginæ laudaverunt eam.

CAPITULUM. *Eccli. 24.*

Qui creavit me, requievit in tabernaculo meo, et dixit mihi: In Jacob inhabita, et in electis meis mitte radices.

HYMNUS.

Te, Mater alma Numinis,
Oramus omnes supplices,
A fraude nos ut dæmonis
Tua sub umbra protegas.

Ob perditum nostrum genus,
Primi parentis crimine,

Ad inelytum Matris decus
Te Rex supremus extulit.

Clementer ergo prospice
Lapsi Adami posteris:
A te rogatus Filius
Deponat iram vindicem.

Jesu, tibi sit gloria,
Qui natus es de Virgine,
Cum Patre et almo Spiritu
In sempiterna sæcula. Amen.

†. Germinavit radix Jesse: orta
est stella ex Jacob. †. Virgo péperit
Salvatorem: te laudamus, Deus nos-
ter.

Ad Bened. Añã. Sancta Maria,
succurre miseris, juva pusillanimes,
refove flebiles, ora pro populo, in-
terveni pro clero, intercede pro de-
voto femineo sexu: sentiant omnes
tuum juvamen, quicumque celebrant
tuam admirabilem Maternitatem.

ORATIO.

Deus, qui de beatæ Mariæ virginis
utero Verbum tuum, Angelo nuntian-
te, carnem suscipere voluisti: præ-
sta supplicibus tuis; ut qui vere eam
Genitricem Dei credimus, ejus apud
te intercessionibus adjuvemur. Per
eundem Dominum...

Et fit com. Dom. occurr.

AD PRIMAM.

Añã. Beata es...

†. *br.* †. Qui natus. *Ad Absol. Ca-
pit.* In platéis... *ut infra ad Nonam.*

AD TERTIAM.

Añã. Genuisti...

Capitulum. Qui creavit... *ut supra
ad Laud.*

†. *br.* Specie tua: * Et pulchritu-
dine tua. Specie... †. Intende, pros-
pere procede, et regna. * Et pulchri-
tudine... Gloria Patri... Specie...

†. Adjuvabit eam Deus vultu suo.
†. Deus in medio ejus, non commo-
vebitur.

AD SEXTAM.

Añã. Beatam me dicent...

CAPITULUM. *Eccli. 24.*

Et sic in Sion firmata sum, et in
civitate sanctificata similiter requie-
vi, et in Jerusalem potestas mea. Et
radicavi in populo honorificato, et
in parte Dei mei hæreditas illius, et
in plenitudine sanctorum detentio
mea.

†. *br.* Adjuvabit eam * Deus vul-
tu suo. Adjuvabit... †. Deus in me-
dio ejus, non commovebitur. * Deus..
Gloria Patri... Adjuvabit...

†. Elegit eam Deus, et præelegit
eam. †. In tabernaculo suo habitare
facit eam.

AD NONAM.

Añã. Viderunt eam...

CAPITULUM. *Eccli. 24.*

In platéis sicut cinnamomum et bal-
samum aromatizans odorem dedi:
quasi myrrha electa dedi suavitatem
odoris.

†. *br.* Elegit eam Deus. * Et præ-
legit eam. Elegit... †. In tabernacu-
lo suo habitare facit eam. * Et præ-
elegit... Gloria Patri... Elegit...

†. Diffusa est gratia in labiis tuis.
†. Propterea benedixit te Deus in
æternum.

*In 2 Vesp. omnia ut in primis,
præter seq.*

Ad Magnificat. Añã. Maternitas
tua, Dei Genitrix Virgo, gaudium
annuntiavit universo mundo: ex te
enim ortus est Sol justitiæ Christus
Deus noster.

Et fit com. Dom. occurr.

